



覽 祕 神 搜

撰 文 炳 章

BWT387/B02

本館據龍威秘書
本排印初編各叢
書僅有此本

搜神祕覽

宋 章炳文

元豐二年。相州安陽縣民段化。目疾失明。其子簡屢求醫不驗。一夕忽夢神人告之曰。與爾此藥。可用人髓下之。則汝父之目立見光明。既悟。手中果得藥。簡乃啣左腕。槌骨取髓。調藥以進。立愈。相州具奏其事。如古之時。有爲父母斷指者。斷復更生。自非至誠。安能動天地。感鬼神哉。似段簡者。安知不然哉。西山費孝先。善軌格。世皆知名。有客人王晏。因售貨至成都。求爲卦。孝先曰。教住莫住。教洗莫洗。一石穀。搗得三斗米。遇明卽活。遇暗卽死。再三戒之。令誦此數言足矣。晏受乃行。途中遇大雨。憩於屋下。路人盈塞。乃思曰。教住莫住。得非此耶。遂冒雨行。未幾。屋顛覆。獨得免焉。晏之妻已私謁隣比。欲誦終身之好。候旋歸。將致毒謀。晏旣至。妻約其私人曰。今夕但新浴者。乃夫也。日欲晡。果呼晏洗沐。重易巾櫛。晏悟曰。教洗莫洗。得非此邪。堅不從。婦怒不肯。乃自沐。夜半反被害。晏驚睨罔測。遂獨囚繫。官府拷訊就獄。不能自辨。郡守錄伏牒。晏悲泣言曰。死只死矣。但孝先所言。終無驗耳。左右以是語上達。翌日。郡守命未得行法。呼晏問曰。汝隣比何人也。曰。康七。遂遣人捕之。殺汝妻者。必是人也。已而果然。因謂寮佐曰。一石穀。搗得三斗米。非康七乎。晏旣辨雪。誠遇明卽活之效歟。